

BEEren kasuak pentsuak erabat debekatu ostean jaiotako animalietan 17/07/20

2005etik 2015era bitartean, EBko 73.000.000 behi ingururi probak egin zizkieten behien entzefalopatia espongiformea (BEE) zeukaten aztertzeke; behi horietatik, debekuaren ostean jaiotako 60 animaliak emaitza positiboa izan zuten BEE klasikoaren kasuan. BEEren kasuan emaitza positiboa izan zuten animalien kopurua 1.259ra areagotzen da, debekuaren aurretik jaiotako abereak kontuan hartzen badira.

Bestalde, BEEren kasu klasikoak nabarmen gutxiago dira EBn urteek aurrera egin ahala: 2005ean 554 kasu jakinarazi ziren, eta 2015ean, berriz, bi besterik ez (biak debekuaren ostean jaiotakoak ziren).

Garbi dago Europak laurogeiko krisialdiaren ondoren BEEri eman dion erantzunari esker izugarri murriztu dela gaixotasunaren prebalentzia behietan. Hala ere, oraindik ere kasu bakan batzuk erregistratzen dira EBn; hori dela eta, Europako Batzordeak kasuon jatorria ikertzeke eskatu zion EFSAri.

EBn BEE kontrolatzeko oinarritzko neurria ganaduaren elikaduran animalia-proteinak debekatzea izan zen. Izan ere, BEE pentsu kutsatuen bitartez transmiti dakieke behiei, batez ere bizitzako lehen urtean.

BEE klasikoaren hirurogei kasu jakinarazi dira EBren debekua 2001ean ezarri ondoren jaiotako behiekin lotuta. Animalia horietako bat ere ez zen elikakatean sartu. Nabarmentzekoa da BEE klasikoa gizakiei transmiti dakiekeen BEE mota dela. Batzordeak EFSAri eskatu zion zehaztu zezala ea kasu horiek pentsu kutsatuek eragin zituzten edo bat-batean sortu ziren, hau da, bistako kausarik gabe.

EFSAko adituek ondorioztatu zuten pentsu kutsatuak direla infekzio-iturri probableena. Horren arrazoia da BEE eragiten duen agente infekziosoa urte askoan aktibo egoteko gai dela. Litekeena da behiek pentsu kutsatuak jan izana, BEEren agente infekziosoa presente zegoelako janaria gordetzean edo manipulatzetan. Bestalde, baliteke pentsu kutsatuen osagaiak EBtik kanpoko herrialdeetatik inportatu izana, eta horrek ere eragin litzake BEE kasuak.

Adituek ezin izan zituzten beste kausa batzuk bazter utzi, kasuak banan-banan ikertzea oso zaila delako. Izan ere, alde batetik, gaixotasuna luzaroan inkubatzen da, eta, bestetik, jarraipen-ikerketa egitean, abeletxeetan ez zegoen informazio zehatz nahikorik, eta horrek zaildu egin zuen ikerketa.

[Informazio gehiago](#)

Espainian animalietan mikrobioen aurkako produktuak erabiltzeari buruzko Europako ikuskaritza 17/07/20

Animalietan mikrobioen aurkako produktuak zentzuz erabiltzeari buruzko ikerlan hau 2016ko urriaren 20tik 28ra egin zen, Espainian, Osasunaren eta Elikadura Segurtasunaren Zuzendaritza Orokorrek estatu kideetan egiten dituen ikerlanen artean. Ikerlan honen helburua zen, alde batetik, albaitaritza-medikamenduen erabilerarekin lotuta mikrobioen aurkako produktuekiko erresistentzia dela-eta sortzen diren arazoei aurre egiteko neurriak praktikoki ezartzeari buruzko informazioa biltzea eta, bestetik, estatu kide batzuentzat kontu horri aurre egiteko lagungarri izan daitezkeen jarduera onen adibideak identifikatzea.

2014an Espainia izan zen albaitaritzan mikrobioen aurkako produktu gehien erabili zuen herrialdea, Albaitaritza Erabilerarako Mikrobioen Aurkako Produktuen Kontsumoa Zaintzeko Europako Proiektuari datuak aurkeztu zizkioten herrialdeen artean, eta, Medikamenduen eta Osasun Produktuen Espainiako Agentziaren arabera, salmentak areagotu egin ziren 2015ean. Horrez gain, Espainia da giza medikuntzan mikrobioen aurkako produktu gehien erabiltzen duten herrialdeetako bat ere.

Estrategia nazional bat ezarri da mikrobioen aurkako produktuekiko erresistentziaren kontra 2014tik 2018ra arteko aldirako, "Osasun bakarra" kontzeptua oinarritzat hartuta. Estrategiak sei helburu ditu, eta helburuetako bakoitzak giza zein albaitaritza arloko ekintzak ditu. Helburuak kualitatiboak dira batez ere, eta borondatezko ekimenen mende daude; izan ere, Espainian ez dago erabilera zuhurreko printzipioak ezartzera behartzeko oinarri juridikorik. Orain arte eginiko lanek honako helburu hauek izan dituzte, besteak beste: antibiotikoen erabileraren jarraipena eta zaintza indartzea, abere-ustategietako osasun-egoera ulertzea (bereziki txerrien sektoreko biosegurtasunetik hasita) eta funtzionarioak, albaitariak eta abeltzaintzaren sektorea mikrobioen aurkako produktuekiko erresistentziari lotutako arazoen inguruan sentsibilizatzea.

Txostenean, oro har, ondorioztatzen da goiz dela oraindik mikrobioen aurkako produktuekiko erresistentziaren aurkako ekintza planaren eraginkortasuna hautemateko baina badaudela zantzuak erakusten dutenak nabarmen murriztu daitekeela Espainian mikrobioen aurkako produktuen erabilera, produktibitatean eta kostuetan eragin negatiborik izan gabe. Zantzu horiek Espainian kolistinaren erabilera murrizteko egin den borondatezko egitasmo batetik eta abeltzainen, albaitarien eta ekoizle taldeen ahalegin indibidualetatik eratorri dira.

[Informazio gehiago](#)

EBko abeltzaintza iraunkorraren aldeko bide-

orria - EU40

EU40k, Europako Parlamentuko kideen sareak, bide-orri bat osatu du Europar Batasunean abeltzaintza iraunkorra sustatzeko. **Dokumentu horren xedea da EBn abeltzaintza-sektore iraunkorra izaten lagun dezaketen ekintzak zehaztea, berrikuntza, teknologia eta zientzia oinarri duten konponbideak erabiliz.** Gainera, bat dator EU40 taldearen filosofiarekin, hau da, EBn abeltzaintza iraunkorragoa izateko xedearekin.

ERRONKAK

Gaur egungo erronkarik handienetako bat elikagaiak modu iraunkorragoan ekoitzi ahal izatea da. Munduko biztanleria handitzen ari da, eta animalia-jatorriko proteinen kontsumoa goraka doa; aldi berean, klima-aldaketa geldiarazi beharra dago. Testuinguru horretan, Europak abeltzaintza-sektorearen iraunkortasuna hobetu behar du.

ZER DA ABELTZAINZA IRAUNKORRA?

Abeltzaintza iraunkorraren bitartez, kalitate oneko produktu seguruak modu eraginkorrean ekoitzi nahi dira, alde batetik ingurumena eta bestetik nekazarien, haien langileen eta tokiko komunitateen gizarte- eta ekonomia-baldintzak babesteko eta hobetzeko. Horrez gain, animalia-espezie guztien osasuna eta ongizatea ere bermatu beharko ditu abeltzaintza iraunkorrak.

Kontzeptu horrekin bat, abeltzaintza ikuspegi holistikoa eta intersektzional batetik landu behar da, eta hiru zutabe hauen gainean eraiki beharko da: ingurumenaren babesa, gizarte-ardura eta ekonomia-bideragarritasuna.

Agiri horretan, EBn abeltzaintza iraunkorra lortzeko zenbait jarduketa gako zehaztu dira kudeatzaile politikoei begira. Besteak beste, honako hauek azpimarra daitezke:

Ingurumenaren babesa

- Abeltzaintza iraunkorrak bioekonomia zirkularrean duen eragina indartzea.
- Animalien osasungintzan I+b sustatzeko eta abeltzainek kontzientziario handiagoa lortzeko testuinguru politiko egokia sustatzea.
- Ingurumenaren kalitatea aintzat hartzea berotegi-efektua eragiten duten gasak (GHG) kalkulatzeko.

Gizarte-ardura

- Iraunkortasunak antimikrobianoekiko erresistentziaren aurkako borrokan duen garrantzia azpimarratzea.
- Animalien ongizatea neurtzea, emaitzak oinarri hartuta.
- Europar Batasuna elikagai gutxiago xahutzeko egiten ari den borrokan abeltzaintza iraunkorrak daukan zeregina sendotzea.
- Abeltzaintza-sektorearen eta kontsumitzaileen arteko arrakala murriztea, kontzientziarioa areagotzeko.

Ekonomia-bideragarritasuna

- Abeltzainei laguntza ematea merkatuan lehiakorrak izaten jarrai dezaten.
- Tokiko produktuen bereizketa sustatzea, eta iraunkortasuna balio erantsi gisa aurkeztea.
- Abeltzaintzaren ikuspegi eta itxaropenei buruzko ikerketa sustatzea, kontsumitzaileen bilakaera-lehentasunei behar bezala erantzun ahal izateko.

[EU-40: Roadmap for Sustainable EU Livestock](#)

Hegazti-gripea Frantzian 17/07/07

Ekainaren 30ean patogenotasun handiko H5N8 hegazti-gripearen (**H5N8 PHHG**) kasu bat **baieztatu** zen Frantzian; zehazki, Brillon hirian izan zen, herrialdeko Nord departamenduan.

Frantziako azken agerraldia martxoaren 17an jakinarazi zen, eta hau da gaur egungo kasuen kopurua:

- **485 agerraldi abeltegi komertzial eta ez-komertzialetan.**
- **55 kasu hegazti basatietan.**

Fokuaren jatorri izan diren instalazioak **Tournai-en** (Belgika) **dauden beste instalazio batzuetatik 15 km-ra** daude; bertan hegazti ez-komertzialak dituzte eta uste da fokua **merkatu batean erositako uso eta oilaskoek** eragina izan daitekeela.

Ekain hasieratik hegazti-gripearen kasu gehiago ere baieztatu dira Belgikan, nagusiki apaingarri gisa hazten diren hegaztietan.

Birusa zabal dadila saihesteko, osasun-agintaritzek zenbait neurri hartu dituzte kaltetutako zonaldean, eta 3 eta 10 km-ko babes- eta zaintza-eremuak ezarri dituzte fokua inguruan. Zonalde horietan hegaztien jabeek, profesionalak izan edo ez, dagozkien biosegurtasun-neurriak aplikatzea espero da.

- [Hegazti-gripearen egoera Espainian eta European](#) - Elikaren berria (2017/04/19)
 - [Frantziako hegazti-gripeari buruzko informazio eguneratua](#) - Frantziako Nekazaritza eta Elikadura Ministerioa (alim`agri).
-

Bektoreek transmititutako gaixotasunei buruzko informazio-mapak 17/05/26

Europako Batasunak eskatuta, EFSaren Animalien Osasun eta Ongizate Taldeak [36 mapa](#)

[interaktibo](#) egin zituen, bektore bidez transmititzen diren gaixotasunen (VBD -ingelesezko siglak-) ezaugarri nagusiak laburbilduz. Mapa horiek webgunean ikus daitezke.

Adituen taldeak 36 VDBetako bakoitzak Europan sartzeko zuen arriskua neurtu zuen, banaka; zehazki, ganaduaren edo etxeko animalien mugimenduaren ondorioz sar daitezke. Horretarako, metodo erdikuantitatibo bat erabili zuten, arriskuaren alderdi esanguratsu guztiak kontuan izateko (MINTRISK eredua), baina EFSAk Europara egokitua (VBD-RISK eredua).

VBD eragile guztietatik (36) zortzik bakarrik izan zuten EBn sartzeko moduko tasa globala (sarrera-tasa, bektorearen transmisioa eta establezimendua kontuan hartuta neurtzen da), eta tasa hori urtean 0,001 sarrera baino gehiagokoa dela kalkulatu zuten. Hona hemen zortzi VBD horiek: Krimea eta Kongoko sukar hemorragikoa, mihi urdinaren birusa, Nilo mendebaldeko sukarra, Schmallenberg birusa, Hepatozoon canis, Leishmania infantum, Bunyamwera birusa eta Highlands J birusa.

Zortzi gaixotasun horien urteko hedapena ebaluatu zen, eta EBn erabilgarri dauden prebentzio- eta kontrol-neurriak ezartzeko beharra zehaztu zen. Horrez gain, VBDen hibernatzeko aukera ere ebaluatu zen, baita osasun publikoan, animalien osasunean eta nekazaritzako ekoizpenean izan dezaketen eragina ere.

Gainerako 28 VBDen sarrera-tasa oso txikia zela ondorioztatu zen eta, horrenbestez, ez zen horiekin loturiko beste ebaluaziorik egin. Arriskua ebaluatzeko erabilitako parametro batzuek zalantzak sorrarazten dituzte eta gaixotasunaren egoera ezegonkorra da edo ezin da aurreikusi; hori dela eta, informazio gehiago eskuratutakoan ebaluazioa eguneratzea gomendatzen da.

Arriskuen ebaluazioa EBko eskualde handietarako eta VBD eragile asko aintzat hartuta egin zen; horrenbestez, lehen hautaketatzat baino ez da hartu behar. VBD jakin baten arrisku-ebaluazio zehatzagoa nahi izanez gero, nazio-mailakoa edo nazioz gaindikoa, EFSA-VBD-RISK eredua doan eskura daiteke.

[Vector-borne diseases - EFSA](#)

Kontrol ofizialei buruzko europar araudia argitaratu dute 17/04/19

Apirilaren 7an **argitaratu dute DOUE L 94n Europako [Parlamentuaren eta Kontseiluaren 2017/625 Araudia \(EB\)](#), 2017ko martxoaren 15ekoa**, elikagaien eta pentsuen legedia eta animalien osasunari eta ongizateari, landareen osasunari eta produktu fitosanitarioei buruzko arauak aplikatzen direla bermatzeko egiten diren kontrolei eta jarduera ofizialei buruzkoa. Horren bidez, hainbat araudi eta zuzentarau aldaratzen dira.

Halaber, araudi berri horrek indargabetu egingo ditu 882/2004 eta 854/2004 araudiak (EE), 2019ko abenduaren 14tik aurrera.

Aurreko albisteetan aurreratu dugun bezala, honako hauek dira, besteak beste, araudi honetako berrikuntzak:

- Hedatu egin da aurreko araudiaren aplikazio-eremua, estaldura handiagoa emateko **Landareen Osasunari, animalien azpiproduktuei** buruzko araei eta **iruzurraren** aurreikuspenari.
- Arau zehatzagoak ezarriko dira dagoeneko estalita dauden zenbait arlotan, besteak beste, **Animalien Osasunaren eta Ongizatearen** arloan.
- Kontrolaren betekizunak egokitu ahal izango dira **sektore bakoitzaren aplikazio-behar espezifiko**en arabera.

[Araudi berriaren edukiari buruzko informazio gehiago](#) - ELikaren berria 2017/03/31

H5N5 eta H5N8 motako PHHGaren egoera Europan 17/04/19

2016ko urriaren 28tik **2017ko apirilaren 3ra**, honako hauek jakinarazi dira Europan:

- **PHHGaren 1.095 foku etxeko hegaztietan**
- **49 gatibu dauden hegaztietan**
- **1.499 hegazti basatietan**

Ikusi txostena: "[Hegazti-gripearen egoera Eurpan, 2017ko apirilaren 3an](#)" - MAPAMA

[OIEk martxoaren 13ko txostenean](#) adierazi bezala, Ipar Hemisferioan gero eta handiagoa da neguan hegazti-gripearen agertzeko arriskua.

2016 eta 2017an, arrisku horren eraginez, **H5N8** kasu ugari agertu dira **Europan**, eta **H5N6** kasu ugari, berriz, **Asian**.

Urtaroaren arabera gorabeherak badaude ere, urte osoan zehar dago arriskua, birusa hegaztietan egonkortu baita eta bertan mantentzen baita.

Hala ere, azpimarratu beharra dago hegazti-gripearen andui zoonotikoak direla osasun publikoarentzat arriskutsuenak; andui horiek endemiko bilakatu dira Txinan (H7N9) eta Afrika zein Asiako hainbat eskualdetan (H5N1).

Espainiako egoera

Estatuaren eta Europar Batasunaren barruko mugimenduak mugatzen zituzten indarreko neurri guztiak kendu egin dira.

2017ko otsailaren 23an, Kataluniako Generalitateko albaitaritzaren arloko agintariak **H5N8 motako PHHGaren foku bat hauteman zuten Gironako probintzian**, loditzeko ahateen ustiategi batean. Hurrengo egunetan, martxoaren 1era arte, beste 9 foku hauteman ziren, 8 Girona probintzian eta 1 Bartzelonan.

Berehala ezarri ziren legediak zehazten dituen honako neurri hauek: kaltetutako ustiategietako hegaztiak hiltzea, ustiategiak garbitzea eta desinfektatzea, eta 3 kilometroko babes-gune bat eta 10 kilometroko zaintza-gune bat ezartzea fokuen inguruan; gune horietan, hegaztien eta haien produktuen mugimendua murriztu zen.

Batzordearen 2017/417 (EB) Exekuzio Aginduaren arabera, **Espainian kalteak jaso dituzten lurraldeetako babes- eta zaintza-guneetako murrizketa-neurriek 2017ko apirilaren 1era arte egon behar zuten indarrean**. Egun hori iritsita, ez da gaixotasunaren kasu berririk hauteman; ondorioz, Estatuaren eta Batasunaren barruko mugimenduei jarritako murrizketa guztiak bertan behera gelditu dira.

Beste herrialde batzuekiko merkataritzari dagokionez, Lehorreko Animalien Osasun Kodeak 10.4.3 artikuluan xedatzen du herrialde edo lurralde batek bere osasun-estatusa berreskuratu ahal izango duela kaltetutako ustiategi guztiak desinfektatzen dituenetik hiru hilabetera. Hori dela eta, **Gironako probintziak eta Bartzelonako Ekialdeko eta Mendebaldeko Vallés eskualdeek beste herrialde batzuekin merkataritzan aritzeko mugak 2017ko ekainaren 2ra arte mantenduko dituzte**. Une horretan, beste kasurik hauteman ez bada, Espainiako lurralde osoak nahitaez aitortu behar den hegazti-griperik gabeko herrialdearen estatusa berreskuratuko du.

Espainiako legedia

Joan den martxoaren 16an, [APM/233/2017 Agindua](#) argitaratu zen. Horrek APA/2442/2006 Aginduko eranskinak aldatzen ditu, eta bertan hegazti-gripearen aurrean babesteko neurri zehatzak ezartzen dira. Besteak beste, hau dio:

- **Hegazti-gripearen sartzeko arrisku handia duten guneak dira padurak, ibaiertzak, kostaldeak, aintzirak eta 1. eranskinean aipatzen den beste edozein hezegune.**
 - **Arrisku faktoreak** dira 3. eta 4. artikuluetan zerrendatutakoak.
-

EFSAk berrikusi egin ditu mingain urdin gaixotasunaren kontrol-neurriak 17/03/10

EFSAk argitaratu berri duen txostenean ondorioztatzen da **5 urteko txertaketa masiboko programak eta etengabeko zaintza-sistemak direla European ardien mingain urdin gaixotasuna errotik kentzeko neurri eraginkor bakarrik.**

Europako Batzordeak hala eskatuta, EFSako adituek mingain urdin gaixotasunaren kontrol-neurriak berrikusi dituzte, bai eta eremu infektatuen eta eremu askeen arteko animalien salerosketa segururako aukerak ere. Halaber, gaixotasunaren alderdi epidemiologikoei buruzko txosten zientifikoa eguneratu dute, batez ere transmisio-ereduari dagokion alderdia.

EFSaren txostenean ohartarazten da **mingain urdin gaixotasuna errotik kentzea oso zaila dela**, eta beharrezkoa dela gutxienez ondoko 5 urtez gaixotasun hori harrapa dezaketen behien eta ardien % 95 txertatzea. Txertaketa masiboko kanpaina horiekin batera, zaintza-sistema sentsibleak ere ezarri beharko dira. Sistema horiek kasuan kasu zehaztu beharko dira, kontuan izanik zaindutako eremu geografikoa eta gaixotasunaren fase epidemiologikoa; horrez gain, virusaren prebalentzia-maila baxuak (animalien % 1 baino gutxiago) hautemateko gai ere izan beharko dira. Hala ere, baliteke gaixotasuna txertaketa-kanpaina bukatu eta handik urte batzuetara berriz ere agertzea.

Halaber, adituek azpimarratu zuten animalia jaio berriek antigorputzak jasotzen dituztela amarengandik, eta horrek hiru hilabetez babesten dituela gaixotasunetik, gutxi gorabehera. Hala ere, antigorputz horiek eragina izan dezakete txertaketan; ondorioz, aldi horretan txertoak ez dira eraginkorrak. Kasu gehienetan, immunitatea oinarritzko txertaketa-eskemako bigarren dositik 21 egunera hasten da.

Beste alde batetik, gaixotasuna transmititzen duten eltxo-espezie batzuk urte osoan daude aktibo, batez ere negu epelak dituzten eskualdeetan, besteak beste mediterraneo arroan. Era horretako eremuetan, virusa edozein unetan transmiti daiteke. Eremu hotzagoetan, esate baterako, Europa iparraldean, eltxoak ez dira aktibo egoten neguko hiru hilabeteetan; aldi horretan, beraz, ez dago transmisiorik.

Datozen hilabeteetan, EFSAk ardien mingain urdin gaixotasun motak sailkatuko ditu, ezaugarrien arabera; hori baliagarria izango da babes- eta kontrol-neurri zehatzak identifikatzeko. Informazio hori 2017ko ekainean argitaratuko da.

[Mingain urdin gaixotasunari buruzko iritzi zientifikoa - EFSA](#)

Europa abeletxeetako untzien ongizatea nola arautu aztertzen ari da 17/02/27

Gaur egun, **ez dago untzien ekoizpena (hazkuntza eta gizentzea) arautzen duen eta untzien**

ongizate-baldintzak bermatzen dituen legeria espezifikorik.

Abeletxeetako untxiei aplikatu beharreko baldintzak abere-ustiategietako animalien babesari buruzko Europako [Kontseiluaren 58/1998 Zuzentarauan](#) jasotakoak dira. Baldintza horiek orokorrak dira abere-espezie guztientzat. Beste espezie batzuek, ordea, araudi espezifikoa dute, hala nola oilo erruleek, gizentzeko oilaskoek, txerriek eta hazkuntzarako txahalek.

Hain zuzen ere, untxien ongizaterako baldintza espezifikoak garatze aldera, **Europako Parlamentuak hau eskatu die Europako Kontseilu eta Batzordeari:**

- Hainbat neurri jasoko dituen **ibilbide-orri bat egiteko**, neurriok ordena kronologikoan jarrita; gutxienez, hau barne hartu beharko du:
- 1. **Jardunbide onak eta animalien ongizaterako arauak ezarriko dituzten gidalerroak.**
- 2. **Untxien osasunari, ongizateari eta ostatu-baldintzei dagokienez EB osoaren ikuspegiak bateratzeko proposamenak** egingo dituen Europako Batzordearen gomendio bat.
- Estatu kideekin batera, ekoizpenak etiketatzeko sistema argiak ezartzeko, eta kontsumitzaileentzako elikagaien informazioari buruzko etiketatze-sistemak erabiltzeko.

Bestalde:

- Estatu kideei proposatzen die gai honen inguruko xedapenak egiteko, Austrian, Belgikan, Alemanian eta Erresuma Batuan indarrean dauden xedapenekin bat etorritz.
- Adierazten du untxien hazkuntzari buruzko ikerketa zientifiko gehiago egin behar direla.

Abeletzeko untxiei buruzko zenbait datu

- Untxiena da Europar Batasunean (EB) gehien hazten den **bigarren abere-espeziea**; hain zuzen ere, urtean 340 milioi untxi baino gehiago hiltzen dira.
- Hala ere, untxien ekoizpenak EBko guztizko **haragi-ekoizpenaren % 1,1 inguru besterik ez du hartzen**.
- Estatu kide gehienetan ez dago untxiak hazteko eta gizentzeko legeria espezifikorik, hauetan izan ezik:
 - Austria (2012, pilatutako kaiolak erabiltzeko debekua).
 - Belgika (2014, pixkanaka kaiolak erabiltzeari uzteko eta 2025erako parke-sistemak abian jartzeko araudia).
 - Alemania (2014, animalien ongizateari buruzko legeriaren hobekuntza, untxien hazkuntza espezifikoki arautuz).
 - Erresuma Batua (2007, abeletzeko animalien ongizaterako erregelamendua, untxien hazkuntzarako baldintza espezifikoak ezartzen dituen).
- Untxien ustiapenak kalte handia izan du EBko haragi-kontsumoaren beherakadaren eta krisi ekonomikoaren ondorioz. **Hiru urtean prezioak % 20 jaitsi dira**, baina ekoizpen-kostuek berdin jarraitu dute.
- EBko untxien hazkuntzaren sektorea beherantz doa etengabe, eta **etorkizunerako proiektzioek aurreikusten dute ekoizpena % 3,9 murriztuko dela**, untxi-haragiaren kontsumoak beheranzko joera baitu.
- Untxien hazkuntzaren sektorea merkatu globalaren egoeren arabera da, eta ez ditu baliatzen Nekazaritza Politika Erkidearen (NPE) I. zutabearen zehaztutako zuzeneko laguntzak edo merkatuko esku-hartzeak.

7. Eguneratzea - H5N8 lehenengo kausa **Kalatuniako ustiategi batean 17/02/24**

Joan den asteazkenean, otsailak 22, Algeteko Albaritza Laborategi Zentralak, Madrilen, baieztatu zuen **H5N8 motako hegazti-gripearen foku bat agertu zela gizentzeko ahateak hezteko aire zabaleko abeletxe batean, Gironako San Gregorio udalerrian**. Gizentzeko ahateak hazteko ustiategi hori sei nabetan banatuta dago, aire zabaleko parkeekin, eta adin desberdinetako 17.800 ahate inguruko errolda du.

Ustiategian gaitza agertu dela berretsi ondoren, 445/2007 Errege Dekretuak ezartzen dituen neurri hauek hartu dira:

- Ustiategia berehala geldiarazi da fokuari susmoa agertu zenetik, eta erroldak eta azterketa klinikoa egin eta laginak hartu dira epidemiologikoki lotuta dauden ustiategi guztietan. Laginak laborategietan ikertzen ari dira gaur-gaurkoz.
- Inkesta epidemiologikoa egin da, fokua nondik etor daitekeen aztertze eta beste ustiategi batzuk mugimenduagatik arriskuan egon daitezkeen ikusteko.
- Gaitzaren eraginpeko ustiategiaren errolda osoa hil da, eta birusa tratamendu-planta baimendu batera heda lezaketen gorpuzkiak, pentsua eta gainerako materialak suntsitu.

Kataluniako Generalitatearen Nekazaritza, Abeltzaintza, Arrantza eta Elikadura Sailak baieztatzen duenez, **lehen hipotesi gisa esan daiteke kutsatzearen arrazoiak litzatekeela birus-mota bat etortzea joan den asteartean topatutako zikoinaren birusarekin, batetik, eta ustiategia hegazti migratzaile ugari -eta, beraz, hegazti basati ugari- igarotzen diren eremu batean egotea**. Iturri horrek adierazi du CReSA Animalia Osasunaren Ikerketa Zentroari azterlan bat aginduko diola gaitza zehazki nondik datorren ikertzeko.

Katalunian, joan den asteartean, Los Aiguamolls del Empordàko Parke Naturalean hilda aurkitutako zikoina batean topatu zen fokua. Horren ondorioz, 3 kilometroko babes-eremu bat finkatu zen, eta eremu horretan dauden hiru hegazti-granjak geldiarazi ziren; granja horiek ere albaitarien ikerketapean daude. Bestalde, 10 kilometroko eremu batean hegazti basatiak ehizatze debekua ezarri da, eta hegazti basatien gaineko zaintza-mailak mantendu.

Aurkikuntza horiek jakinarazteak ez dakar ez muga komertzialik, ez hegazti bizien edo haien produktuen mugimenduaren gaineko mugarik. Horrez gain, ez da uste osasun publikorako arriskurik dagoenik; izan ere, birus osoaren sekuentzien analisis oinarritutako azterketa genetikoek erakusten dute hegazti-birus horrek ez duela gizakienganako afinitate berezirik. Gainera, birusa ezin da gizakiengana transmititu hegazti-haragi kozinatuaren, arrautzen edo hegazti-eratorrien bitartez. Biosegurtasunerako neurriak muturreraino eraman behar dira, ordea, gaitza etxeko hegaztiei transmiti ez dakien.

2016ko urriaren 28tik gaur arte, **Europar IAAPen 781 foku jakinarazi dira etxeko hegaztietan, 38 foku hegazti gatibuetan eta 972 foku hegazti basatietan**.

